

# Parosifa kuisow fain Yon-ke siisimok

## Miimow opora

Parosifa fain maa erup maek. Wi Kristen teeria Mua Maneka ne ona Muuka Yeesus Krai wameiya ikok uroma, kema kuisow ikauk naek. Aria wi teeria oko epa kokoma-pa ikemik nain-ke wia peeskimemi wia mufiwkin Mua Maneka me piipuaik naek.

Wi mua epa kokoma-pa ikemik nain feenap maimik, maa unowa miiwa-pa ikomakek nain eliw marew. Ne Yeesus Mua Maneka Muuka-ke, naapeya o mua mia kanima arowa nain weetak, ne pun miiw maa unowa onimik nain me onam-ikua, wi naap maemik. Ne wi feenap maemik, mua eena Mua Maneka wameiya ikowa kookalep-na miiw maa unowa fain me kema suuwinok. Sira eliw wia onowa nain miiw sira oram-ke ne mua wia kookalowa sira pun naap. Naapeya sira nain me ookuk naemik. Naapeya Yon-ke naap maemik nain me wia miimuk naep parosifa fain siisimok. Feenap maek, Krai imenaremi mua mia arek, ne wi mua o opora wiar opimik nain Mua Maneka kookaluk. Ne mua oko pun wia kookaluk, naap maek.

---

## Eliwa ikowa opora

**1** <sup>1</sup>Aria i parosifa nia siisimomimik fain Opora eena anane eliw ikowa onoma nain nia maaku naep. Opora nain miiw maa muutitik me imenarowa ikaeya ona naap ikua. I yiena ifan onaiya miimamik ne yiena mokoka-pa urufamik nain maimik. Makena, o yia opap piek nain baliwep akena urufamik. <sup>2</sup>Anane eliw ikowa nain-ke miiw mua areya urufamik. I naap baliwep urufap, nain maemi nia maakimik nain makena-ke. Neemi nia maakimik, mua eena anane eliw ikowa onoma nain Auwa wiar ikok orop ariman akena miira yia ofakowak. <sup>3</sup>I Auwa ona Muuka Yeesus Krai ikos wi wiamiya kema epaskun ikaimik. I fain naep maa urufap miimamik nain nia maakimik. Ne nis pun opora opap i yiamiya ariwkin unowiya kema epaskun ikaiyen. <sup>4</sup>I unowiya kema eliw manekiw ikaikua naep parosifa fain nia siisimomimik.

### Epa parina-pa soomariyen

<sup>5</sup>Aria i o opora yia maakek nain ariman nia maakimik, feenap, Mua Maneka parina-ke, o kokoma marew akena, weetak. <sup>6</sup>I feenap maiyen-na, “I o wameiya kema epaskun ikemik.” Naap maimik, nain epa kokoma-pa ikaiyen-na neeke wadolalimik, opor makena me ookimik. <sup>7</sup>Ne i parina eena ona ikua neeke ikaiyen-na i unow maneka kema epaskun ikaiyen. Ne ona Muuka Yeesus aka-ke yia yasuweya i pina marew, dubila ikaimik.

<sup>8</sup>Ne pun i pina marew yiam maiyen-na oram yiena yiam peeskimimik, opor makena me ookimik. <sup>9</sup>Nain i pina wasirkiyen-na, o opora maek nain makena yia opomami pina yiar iraremi ni pina marew yia nainon. Naeya i dubil maneka ikaiyen. <sup>10</sup>Mua Maneka i unowiya pina mua yia naiya. Ne i maiyen-na, “I pina-ko me onamik,” naap maiyen-na Mua Maneka mua wadola puukowiyen, ne ona opor makena kema-pa me yiar ikua.

### Krais-na yia asipow mua-ke

**2** <sup>1</sup>Aria yena muuk unowa, ni pina me oneka naep parosifa fain nia siisimomiyem. Nain mua-ko pina-ko oninon-na Yeesus Krais ikua, eena pina marewa, dubila ikaiya nain. Os-ke i emina-pa yiar iimarep i opora Auwa yia maakomiya. <sup>2</sup>I pina onimik nain Mua Maneka-ke sirirowa yiiya. Nain os-ke pina yiar aawep ona mia-pa wame wueya Mua Maneka me yia siririya. Ne me i muutiw, miiw mua unowiya naapiw wia oniya.

<sup>3</sup>Ne o sira wuak nain baliwep wiar ookiyen-na maiyen, “O amisaremik,” eliw naap yiam maiyen. <sup>4</sup>Mua-ko mainon-na, “Yo o amisarem.” Naap maep sira me wiar ookinon-na, mua wadola-ke, ne opor makena kema-pa me wiar ikua. <sup>5</sup>Ne mua eena opora wiar ookiya nain, o kookaliyem naek nain makena, manek akena kookaliya. I Mua Maneka wameiya ikemik, ne opora nain makena arinok naep naap onowa-ke. <sup>6</sup>Feenap, mua-ko mainon-na, “Yo Mua Maneka wameiya ikem.” Naap maep-na o Yeesus sira wiar ookam-ikainok.

### Mua eena mua oko saliwiya nain parina-pa ikua

<sup>7</sup>Aria emar unowik, wia kookalowa sira maemi nia siisimomiyem fain me sira enuma-ke, weetak, awona-ke, iiriw eena ni Yeesus Krais opora opaman iir nain sira nia maakiwkin ookaman. Ne aakisa pun ookam-ikaiman, nain-keriw. Sira awona nain maiwkin iiriw miimaman. <sup>8</sup>Sira awona nain-ke, nain yo kiiriw opora enumiyem. Feenap, epa kokoma mesenaleya aakisa parin makena-ke wilinem-ikaiya, naapeya sira makena Krais mia-pa makena arek, ne sira nain nis pun niar ikua. <sup>9</sup>S ira feenap, mua-ko mainon-na, “Yo Yeesus parina-pa ikem.” Naap maek, nain Yeesus teeria mua oko me kookalinon-na mua nain epa kokoma-pariw

ikua. <sup>10</sup>Ne mua eena Yeesus teeria mua oko wia kookaliya nain parina-pa ikua. Sira samora me wiar ikua, naeya maa mauwa-ke mika-suuweya pina-pa wakinon? Weetak. <sup>11</sup>Ne mua eena Yeesus teeria mua oko me wia kookaliya nain epa kokoma-pa ikua. Ne naap ikiwemi mokoka kokoma tenep era kookopiya.

<sup>12</sup>Aria yena muuk unowa, Mua Maneka-ke Krai unuma-pa ni pina niar iirarek. Naapeya yo parosifa fain nia siisimomiyem.

<sup>13</sup>Ne ni mua iperowa, ni Krai amisareman, eena miiwa me imenarowa ikaeya o iiriw ikua nain. Naapeya parosifa fain nia siisimomiyem. Ne ni takir ele-eliwa, ni Satan nomakeman. Naapeya parosifa fain nia siisimomiyem. Ne yena muuk unowa, ni Auwa baliwep amisareman. Naapeya parosifa fain nia siisimomiyem. <sup>14</sup>Ne ni mua iperowa, ni Krai amisareman, eena miiwa me imenarowa ikaeya o iiriw ikua nain. Ne ni takir ele-eliwa, ni kema pukeman. Mua Maneka opora ni kema-pa n iar ikua, naeya Satan nomakeman. Naapeya yo parosifa nia siisimomiyem.

### I miiw sira me kookalikua

<sup>15</sup>Aria ni miiw fain sira-pa miiw maa muutitik me kookaleka. Mua eena miiw maa muutitik kookaliya nain Mua Maneka me kookaliya. <sup>16</sup>Moram miiw sira fain me Auwa wiar ekapok, weetak, ona miiw mua-ke imenamik, wi pina mua eena maa nain kema manekiw ikaimik nain. Wi maa urufap mokoka kuimik nain, ne maa muutitik onaiya ikok yo yaisow naemi wiam pirimik, sira unowa nain. <sup>17</sup>Miiwa ne maa muutitik mua eena maa nain kema manekiw ikaimik nain wiimar iiwawun mesenalinon. Nain mua eena Mua Maneka kookalowa wiar ookiya nain anane maneka eliwa ikainon.

### Krais iiwua iiriw imenaremik

<sup>18</sup>Aria yena muuk unowa, miiwa weeserowa nain epa nan tiil aremikaiya. Ni iiriw feenap maiwkin miimaman, mua oko-ke ekapemi Krai iiwuaremi mainon, “Yo Krai-ke,” naap wame mainon. Ne aakisa mua unowa naap wiam maowa nain iiriw ekapemik. Naapeya i amisarep maimik, epa nan weeseriya. <sup>19</sup>Wi mua naap nain opora sira onaiya maemi i teeria-pa ikok yia piipuamik. Wi i sira epaskun ikekamik-na i yiamiya ikekamik. Nain yia piipuamik. Naapeya i amisarep maimik, wi nain me i teeria kakeniw-ke.

<sup>20</sup>N ain Ewar Eliwa-ke oromi kema nieya unowiya opor makena amisareman. <sup>21</sup>Ne yo parosifa nia siisimomiyem fain me ni opor makena me amisariwkin siisimiyem, weetak. Ni opor makena amisareman, naap maep siisimiyem. Ne ni fain pun amisareman, opor makena era-pa wadola-ko me imenariya, weetak. <sup>22</sup>Aria mua kain mua wadola-ke? Mua eena feenap maiya nain, “Yeesus-na me Krai-ke,” naap maiya nain

mua wadola-ke. O Krai iwua-ke, Auwa Mua Maneka ona Muuka ikos makena-ke me wia naemi wia poraiya nain-ke. <sup>23</sup>Ne mua eena Muuka unuma poraiya nain Wiawi wameiya me wiar ikaiya. Aria mua eena Muuka makena-ke naiya nain Wiawi wameiya wiar ikaiya.

<sup>24</sup>Ne ni iiriw Yeesus Krai opora opaman nain eena opora nia maakiwkin miimaman nain kema suuwam-ikeka. Ni opora nain kema suuwam-ikowen-na ni Mua Maneka Muuka ona Wiawi ikos kemena-pa wiar ikowen. <sup>25</sup>Ona opora yia maakep koonowak nain anane eliwa ikowa nain-ke.

<sup>26</sup>Wi mua papako nia peeskimemi era oko nia pikiwimik, muut nain nia maakekam naep opor unowa fain nia siisimomiyem. <sup>27</sup>Aria ni iiriw Ewar Eliwa-ke niar orok. Ne ona kema niem-ikaiya, naeya mua oko-ke me nia maakikuan, ona nia maakem-ikaiya. Ne o opor unowa nain makena, me wadola-ke. Naapeya ni Ewar Eliwa opora wiar ookami Krai wameiya ikeka.

### I Mua Maneka muuk teeria-ke

<sup>28</sup>Ne yena muuk unowa, o wameiya ikeka. Naeya o nainiw ekapiya nain i onowiya emin ururowa marew kekanep o miira-pa ikaiyen. <sup>29</sup>Ne ni Krai amisareman, o mua kakeniw akena-ke. Ni nan amisareman, wi mua sira makena ookimik nain Mua Maneka muuk teeria-ke.

**3** <sup>1</sup>Auwa Mua Maneka yia kookaliya nain manek akena yia kookalep yiena muuka wiipa unowa yia naiya. Aa, i wiar kema suuwowa me pepek! Maken akena, i muuka wiipa wiar ikemik. Miiw mua unowa o me amisarep me ookimik, naapeya is pun me yiokimik. <sup>2</sup>Emar unowik, i Mua Maneka muuka wiipa unowa-ke. Nain i wiimar kamenap ariyen nain aakisa baliwep me amisarowa ikemik. Wiimar Krai ekapiya nain ona kamenap ikua nain maken akena urufiyen, naapeya is pun o ikua naap akena ikaiyen. <sup>3</sup>Krai ona dubil manekiw ikaiya. Naeya i o urufiyen naep kemaiw yiam tuupam-ikaimik nain arewap ikok yiena kukusa yiam saliwami dubil manekiw ikaimik.

<sup>4</sup>Ne wi mua pina onimik nain Mua Maneka sira wiar puukimik. Makena, wi pina onimik nain Mua Maneka sira wiar fienimik nain-ke. <sup>5</sup>Ne Krai ona pina marew nain i miiw mua pina yiar iirarekam naep miiwa orok. <sup>6</sup>Naeya wi mua eena Krai kemena-pa wiar ikemik nain pina me onam-ikaimik. Ne wi mua eena pina onam-ikaimik nain wi Krai me urufamik ne me amisaremik.

<sup>7</sup>Naapeya muuk unowa, ni maa uru-urufap, mua oko-ke sira samora onowa me nia peeskimuk. Krai ona kakeniw ikaiya, naapeya mua eena sira kakeniw ookiya nain mua kakeniw-ke. <sup>8</sup>Satan iiriw miiwa me imenarowa ikaeya pina onak. Naeya mua eena pina onam-ikaiya nain Satan teeria-ke. Naapeya Mua Maneka Muuka miiwa orok nain

Satan uuwowa iiwawun wiar samorekam naep orok. <sup>9</sup>Ne mua eena Mua Maneka muuka wiar arek nain Wiawi sira kema manekiw ikaiya, naapeya pina me oniya. Mua Maneka ona Wiawi-ke, naapeya pina onowa kema marew. <sup>10</sup>Sira neeke i amisaremik, mua kain Mua Maneka muuk teeria-ke, ne mua kain Satan teeria-ke, naap maimik. Feenap, o mua sira kakeniw me oniya ne Yeesus Krai teeria mua oko me wia kookaliya nain me Mua Maneka muuk teeria-ke.

### Mua oko wia kookalowa sira

<sup>11</sup>Aria ni Yeesus Krai opora opaman nain, iir nain opora fain iiriw nia maakiwkin miimaman. Nain feenap, i ona teeria mua oko wia kookalowa-ke. <sup>12</sup>Ni Kein sira me wiar ookeka, o Satan teeria wiar ekap ona wiamun aka epaskun oram enuma ifakimok. Ona wiamun moram ifakimok? Onoma feenap, o sira onomakek nain eliw marew, ne ona wiamun sira onomakek nain eliwa-ke. Nain kema bagiwirap wiamun ifakimok. <sup>13</sup>Naapeya emar unowik, wi mua oko-ke kema nia iririmemi nia samoriwkin-na me soraneka, ni iiriw amisarep ikeman. <sup>14</sup>I mua oko wia kookalimik. Naapeya yiam amisarep yiam maimik, i umep nainiw iikiramik naimik. Ne mua eena mua oko me wia kookaliya nain umep ikowa saarik ikua. <sup>15</sup>Ne mua eena mua oko iiwuaria nain mua nain ifakimowa saarik oniya. Ne ni amisareman, mua naap nain anane eliwa ikowa nan me ikua.

<sup>16</sup>Aria wia kookalow sira maimik nain Yeesus wame wuami umok neeke amisariyen. I pina muuta nain sirirowa aawep umok, naapeya is pun mua oko wia kookalep wia asipami eliw sirirowa aawowa-ke. <sup>17</sup>Nain feenap, mua oko maa unow onaiya ikua nain Yeesus Krai teeria mua oko maa-ko iwareya me asipam-ikua, nain eliw feenap mainon-i, “Mua Maneka wia kookaliya nain yos pun mua naap wia kookaliyem nain-ke.” Nain o naap me wame mainok. <sup>18</sup>Naapeya nia maakiyem, i oram opora-pa wia kookalimik me naiyen, weetak. I wia kookalimik akena naemi makena, wia asipam-ikok naap eliw maiyen.

<sup>19-20</sup>Ne i sira eliwa naap onami maiyen, i Yeesus opor makena ookimik. Aria iir oko i kema-pa sira yiam pupep maimik, “Yee, yo pina onam, Mua Maneka-ke efa iirarion,” naap yiam maimik. Nain i yiena kema baliwep me yiam amisaremik, Mua Maneka kema baliwep akena yiar amisarek. Os-ke eliw sira yiar mainon. Naapeya i naap maemi kema tenep ikaiyen.

<sup>21</sup>Aria emar unowik, yiena kema-pa sira yiam pupep maiyen-na, “Yo pina onaiya me ikem,” makena naap maep-na, Mua Maneka mokok epa-pa ikowa keker opowa marew ikaiyen. <sup>22</sup>I opora yia maakek nain ookimik ne pun o kookaliya naap onimik. Naapeya maa nokariyen-na yiar apekarion. <sup>23</sup>Ne opora feenap yia maakek, yena Muuka Yeesus Krai opora wiar opaka, ne ona sira nia maakek naap mua oko wia kookaleka, naap yia

maakek. <sup>24</sup>Wi mua o opora wiar ookimik nain kemena-pa wiar ikemik, ne ona wiamiya ikaiya. Ne ona Ewar Eliwa sesekeya yiamiya ikaiya, neeke amisarep maimik, Mua Maneka yiamiya ikaiya, naap maimik.

#### **Mua Maneka Ewar opora yia maakiya nain makena-ke**

**4** <sup>1</sup>Aria emar unowik, wi mua papako maimik, “Ewar Eliwa-ke kema yieya opora maimik.” Wi naap maiwkin-na opora ewur makena-ke me wiar naeka. Moram wi wadol mua unowa yiwemi profet-ke wiam maimik. Naap maiwkin-na ni mokomokoka wia amisarep-puap, nain Mua Maneka Ewar-ke kema iwok-i e weetak. Naap maep wia akimeka. <sup>2</sup>Wi mua eena Mua Maneka Ewar onaiya ikemik nain feenap maiwkin wia amisarowen, “Yeesus Krai miiwa orok nain miiw mua mia puukap ikua.” Naap maiwkin-na maeka, mua nain Mua Maneka-ke opora maakek. <sup>3</sup>Ne wi teeria naap me maimik nain wi Mua Maneka Ewar onaiya me ikemik. Wi ewar nain Krai iwua-ke, eena ikoka ekapinon, nain maiwkin miimaman nain nanek.

<sup>4</sup>Aria muuk unowa, ni Mua Maneka teeria-pa wiar ikeman. Ne Ewar Eliwa niamiya ikaiya nain kekanowa akena-ke, wi ewar wadola nain iiwawun wia nomakek. Naapeya nis pun wi wadol mua wia nomakeman. <sup>5</sup>Wi miiw mua pun miiw sira unowa aakunimik, naapeya mua unowa opora wiar miimimik. <sup>6</sup>Ne i Mua Maneka teeria-ke, ne wi mua Mua Maneka amisarep ookimik nain i opora wia maakemkun yiar miimimik. Aria wi Mua Maneka teeria-pa me wiar ikemik nain opora me yiar miimimik. Neeke i eliw rookasep wia maiyen, “Aa, ewar fain makena-ke, ne nain weetak,” naap maiyen.

#### **Mua Maneka yia kookaliya**

<sup>7</sup>Aria emar unowik, wia kookalowa sira nain Mua Maneka ona kema yiiya, naapeya i mua oko wia kookalikua. Mua eena mua oko kookaliya nain Mua Maneka muuk teeria-ke. Ne pun Mua Maneka baliwep amisarek. <sup>8</sup>Mua Maneka mua wia kookalowa onoma-ke. Naapeya mua eena mua oko me kookaliya nain Mua Maneka me amisarek. <sup>9</sup>Mua Maneka ona yia kookaliya nain feenap yia ofakowak. Ona Muuka kuisow eena kema muneka nain yia sesekomak. Naeya i o wiar ekap anane maneka eliwa ikaimik. <sup>10</sup>Wia kookalowa sira makena feenap, me is-ke Mua Maneka kookalemik, weetak. Ona yia kookalep ona Muuka sesekeya orop i miiw mua pina yiar akuawep umok.

<sup>11</sup>Emar unowik, Mua Maneka manek akena yia kookalek nain sira naap onak, naapeya is pun yiam kookalem-ikaiyen. <sup>12</sup>Mua kuisow Mua Maneka-ko me urufak. Nain i yiam kookaliyen-na Mua Maneka yiamiya ikainon. Ona yia kookalowa sira kema yiem-ikaeya sira nain ookami baliwep yiam wuami yiam saliwam-ikaiyen.

<sup>13</sup>M ua Maneka ona Ewar Eliwa yiek. Naapeya amisarep maimik, makena i kemena-pa wiar ikaimik, ne o yiamiya ikaiya, naap maimik. <sup>14</sup>Aria i yiena mokok onaiya Mua Maneka Muuka urufamik, naapeya nia maakimik, “Makena, Mua Maneka-ke ona Muuka sesekak, i miiw mua yia aawinok naep,” naap maimik. <sup>15</sup>Ne mua-ko feenap mainon-na, “Yeesus-na Mua Maneka Muuka-ke,” naap maiya nain Mua Maneka o wameiya ikaiya, ne o Mua Maneka kemena-pa wiar ikaiya. <sup>16</sup>Mua Maneka yia kookaliya nain amisarep maimik, nain makena-ke.

Mua wia kookalowa onoma Mua Maneka ona. Ne mua eena mua oko wia kookalowa kema manekiw ikaiya nain Mua Maneka kemena-pa wiar ikaiya, ne Mua Maneka o wameiya ikaiya. <sup>17</sup>I miiwa-pa ikemik fain Krai sira baliwep wiar ookimik. Ne Mua Maneka-ke kema yiem-ikaeya i baliwep akena yiam kookalep yiam saliwowiw ikaimik. Naapeya Mua Maneka eena yia mekawow fofa neeke i karanow marew kekanep ikaiyen. <sup>18</sup>Mua eena mua oko wia kookaliya nain keker opowa marew. Sira-ke feenap ikua, yo pina onamkun sirirowa yiikuan, naap maep no keker opinan. Nain no maken akena wia kookalep wia saliwowiw ikain, sira nain-ke kema manekiw nefar ikaeya keker opowa kema me nefar ikainon. Naapeya mua keker opiya nain mua oko maken akena me wia kookaliya.

<sup>19</sup>M ua Maneka ona kiikir yia kookalek, naapeya i mua oko wia kookalimik. <sup>20</sup>Ne mua-ko feenap mainon-na, “Yo Mua Maneka kookaliyem,” ne mua oko me wia kookalinon-na mua nain mua wadolake. Moram mua ona mokok onaiya wia urufami wiamiya aakuniya nain me wia kookaliya, naep Mua Maneka me urufiya nain kamenap kookalinon? <sup>21</sup>Ne Krai eena sira yia maakek nain feenap, mua eena Mua Maneka kookaliyem naiya nain mua oko pun wia kookalinok.

### Mua Maneka Muuka opora wiar opiyen

**5** <sup>1</sup>Aria mua eena Yeesus-na Krai-ke naiya nain Mua Maneka muuk teeria-ke. Ne mua eena Wiawi wiar kookaliya nain ona Muuka pun wiar kookaliya. <sup>2</sup>I Mua Maneka kookalep opora wiar ookimik. Neeke amisarep maimik, i Mua Maneka muuk unowa wia kookalimik, naap yiam maimik. <sup>3</sup>Mua Maneka eena sira wuomakek nain wiar ookimik, neeke o kookalimik. Ne sira unowa yia maakek nain ookowa me yoowa akena, weetak. <sup>4</sup>Moram Mua Maneka muuk unowa wiar aremik nain wi miiw sira ookowa miatinimik. I Mua Maneka opora wiar opimik neeke miiw sira ookowa miatinimik. <sup>5</sup>Ne naareke miiw sira ookowa miatininon? Mua feenap maiya nain, “Y eesus-na Mua Maneka Muuka-ke,” mua nain-ke makena, o pepek.

<sup>6</sup>Y eesus Krai eena miiwa orok nain maa erup fain-ke o ilenimik, eka ne aka. Me eka muutiw o ileniya, weetak. O eka-pa yasuwamik, ne oko, ona umep

aka sawikak. Ewar Eliwa-ke opor makena maowa onoma, ne o Yeesus Krai maemi yia maakiya nain opor makena-ke. <sup>7</sup>Ne maa arow nain-ke opora kuisow nain koonowami maimik. <sup>8</sup>Feenap, Ewar Eliwa opora maek nain, aria o eka-pa yasuwamik nainiya, aria aka mia-pa wiar orok nain, maa arow naap epaskun wuami maimik. <sup>9</sup>Wi mua opora makena-ke naep maimik nain makena-ke wiar naimik. Nain Mua Maneka opora maiya nain maken akena-ke. Naapeya maa arow nain-pa ona Muuka maemi yia maakiya nain maken akena-ke, mua opora wiar nomakek. <sup>10</sup>Wi mua Mua Maneka Muuka opora wiar opimik nain wienna kema-pa maimik, makena, Yeesus Krai Mua Maneka Muuka-ke, naap maimik. Mua Maneka ona Muuka makena maek. Nain wi mua opora nain makena-ke me wiar naimik nain Mua Maneka wadol mua puukowimik. <sup>11</sup>Opor makena yia maakek nain feenap, ona Muuka anane eliwa ikowa onoma-ke. Ne muuta nain ona Muuka sesekami anane eliwa ikowa nain yia wuomak. <sup>12</sup>Naeya wi mua Mua Maneka Muuka kemena-pa wiar ikemik nain wi anane eliwa ikaimik. Ne wi o kemena-pa me wiar ikemik nain, weetak.

#### Anane eliwa ikowa

<sup>13</sup>Ni Mua Maneka Muuka unuma makena-ke naep opora wiar opam-ikaiman. Ne i anane eliwa ikaiyen, naap amisarep maeka naep parosifa-pa maa muutitik nia maakiyem. <sup>14</sup>Naapeya i Mua Maneka keker opowa marew kekanep o wameiya ekimik. Neemi i ona kookalowa ookami maa nokarimik nain yia apekariya. <sup>15</sup>Ne makena, i maa nokaremku yia apekariya, naap maimik. Naapeya maimik, maa mauwa nokarimik nain iiriw yia apekarep ikua, naemi ikoka makena urufiyen naimik.

<sup>16-17</sup>Ne nena teeria epaskun mua-ko pina oneya urufin. Nain pina onak nain umep iiwawun mesenalowa nain me imenak. Aria no Mua Maneka fareya o asipeya anane eliwa ikowa era-pariw ikainok. Sira samo-samora onimik nain iiwawun pina manekiw. Nain me unowiya umep mesenalowa era-pa yia pikiwiya. Wi mua papako Yeesus Krai mikikira iwep mesenalikuan, naapeya yo feenap me wia maiyem, “Ni Mua Maneka wia faromaka,” naap me nia naiyem, weetak.

<sup>18</sup>I amisaremik, i Mua Maneka muuk teeria wiar aremik nain pina me oni-ikim-ikaimik. Moram Mua Maneka Muuka ona pika yia warikap-pueya ikemik. Naeya Satan yia samorowa nain me pepepek. <sup>19</sup>Amisarep maimik, i Mua Maneka muuk unowa wiar ikemik, nain miiw emeria mua unowa Satan tepak-pa wiar ikemik. <sup>20</sup>Ne fain pun amisarep maimik, Mua Maneka Muuka iiriw ekapok, ne kema yia fookak, naeya Mua Maneka maken akena amisaremik. Mua Maneka maken akena-ke, ne i o kemena-pa wiar ikemik. Ne pun ona Muuka Yeesus Krai kemena-pa wiar ikemik. Mua Maneka maken akena-ke, anane eliwa ikowa onoma os.

<sup>21</sup>Aria yena muuk unowa, ni wi mua miira sirarep yiena inasina-ke naep sira-sira onimik nain me wiokeka.